



## 7. Tschanteda dal cussagl cumünel in marculli, ils 10.04.2013 a las 19.00 in chesa cumünela S-chanf

**Presidi:** Duri Campell

**Preschaints:** Gian Andrea Bott, Ines Barblan, Gian Fadri Largiadèr, Paolo Bernasconi

**Absaints:**

**Actuar:** Duri Schwenninger

---

### Tractandas:

1. Protocol
2. 0.211 Dumandas da fabrica
3. 1.110 Viletta-Camichel Claudia, dumanda per permiss d'ustaria per mner il restorant Prasüras
4. 1.090 Surpassamaint da la ledscha da fabrica, artichel 72, zona da pos per la sulvaschina Laret
5. 8.100 Surder transport da laina, tagl da laina God God
6. 1.450 Vschinauncha da Zuoz, dumanda per surpiglier part dals cuosts proget püttas per miner lavinas
7. 3.400 OK Tour de Suisse La Punt, dumanda per sustegn finanziel
8. 9.999 Varia

La glista da tractandas vain approveda sainza objecziuns.

**Protocol:** Il protocol da la tschanteda dals 28 marz 2013 vain approvo unanimamaing.

**43 0.211 Dumanda da fabrica  
Parcela nr. 30, definir termin per restabilir ils giatters davaunt las  
fnestras in stedi leghel**

Il cussagl vaiva decis in sia tschanteda dals 6 favrer 2013 da pretender cha'ls giatters davaunt las fnestras vegnan restabilieus in stedi leghel tenor sentenzcha dal güdisch administrativ e d'introdür la procedura da multa. In seguit s'ho do a la patruna da fabrica la pussibilitad da piglier pusiziun e d'inoltrer actas per pudair definir l'otezza da la multa. Il giurist ho inoltro traunter oter üna charta chi muossa vi sün fats chi nu sun avautmaun. Il cussagl decida cun 3 cunter 2 vuschs da multer il surpassamaint cun fr. 900.00 e da pretender cha'ls giatters vegnan restabilieus i'l stedi leghel fin il pü tard ils 30 gün 2013.

**44 1.110 Permiss butias/ustarias  
Viletta-Camichel Claudia, dumanda per permiss d'ustaria per  
mner il restorant Prasüras**

Ad üna dumanda da Claudia Viletta-Camichel per mner la gestiun da restoraziun dal restorant Prasüras aderisch'il cussagl unanimamaing. La taxa pel pemiss vain fixeda sün fr. 300.00.

**45 1.090 Giuridicziun  
Surpassamaint da la ledscha da fabrica, artichel 72, zona da pos  
per la sulvaschina Laret**

Il cussagl cumünel vain infurmo davart 2 surpassamaints da l'artichel 72 alinea 2 da la ledscha da fabrica. Zieva avair do la pussibilted da piglier pusizioni, decid'il cussagl unanimamaing da multer ils surpassamaints cun fr. 200.00 per persuna, exclus cuosts supplementers.

**46 8.100 Forestel  
Surder transport da laina, tagl da laina God God**

Per transporter la laina dal tagl da laina God God fin tar la via e zieva tal deposit God God s'ho trat aint offertas. Il cussagl piglia cugnuschentscha da 3 offertas e decida cun 4 cunter 1 vusch da surder la lavur da transport fin tar la via a Gian Denoth da Tschlin per l'import da fr. 30.00 /m<sup>3</sup> e medemmamaing a Gian Denoth per la lavur da transport fin tal deposit da laina God God per fr. 50.00/ l'ura. Tar la surdeda ho il cussagl resguardo la varianta chi schinagia il pü ferm il terrain dal god. Impü decid'il cussagl unanimamaing da surder la lavur dal tagl da laina tal god Laret a la firma Thomann SA, da Parsonz per l'import da fr. 90.00/m<sup>3</sup>.

**47 1.450 Protecziun cunter prievels da la natüra  
Vschinauncha da Zuoz, dumanda per surpiglier part dals cuosts  
proget pütts per miner lavinas**

La vschinauncha da Zuoz ho lascho elavurer ün proget per l'installaziun da 9 pütts per miner lavinas süls ots sur Zuoz, per pudair reagir in avegnir auncha pü svelted ed in möd efficiaint cunter prievels da lavinas. Quist proget cuosta arduond fr. 1'600'000.00 e vain subvenziuno da la Confederaziun e dal chantun Grischun cun 70%, la Viafier retica surpiglia fr. 100'000.00 ed uschè restan per la vschinauncha da Zuoz cuosts ill'otezza da fr. 480'000.00. La vschinauncha da Zuoz pissera daspö decennis per la sgürezza da la via chantunela veglia, dal binari da la viafier Retica, da sendas scu eir loipas sainza metter in quint las spaisas. Sün nos territori vain controllada adüna la situaziun da lavinas in val Gianduns e sgüro cun que eir üna part dal territori da S-chanf. Il cussagl cumünel da Zuoz dumanda per üna contribuziun vi dals cuosts dal proget ill'otezza da fr. 80'000.00. Zieva cuorta discussiun decida il cussagl unanimamaing da propuoner a la radunanza da prevzair quel import i'l preventiv 2014.

**48 3.400 Sport  
OK Tour de Suisse La Punt, dumanda per sustegn finanziael**

Ils 14 gün 2013 maina l'etappa decisiva da la Tour de Suisse da Meilen sur il pass da l'Alvra fin a La Punt. Il cussagl piglia cugnuschentscha da la dumanda dal comitè d'organisaziun per üna contribuziun. Il cussagl decida unanimamaing da sustgnair l'occorrenza cun fr. 1'000.00.

**49 9.999 Varia**

Il president infurmescha, cha'ls 30 avrigl 2013 ho lö a Puntraschigna üna tschanteda pels cusgliers cumünels e pels grands cusgliers regard il proget refuorma dal territori in nossa regiun.

Inavaunt infurmesch'il president sur da la tschanteda culs respunsabels da l'Armasuisse in connex cun surpiglier la Villa Gredig a Chapella. Las trattativas haun pudieu gnir glivredas giò ed infra temp gnaro suottamiss a la vschinauncha üna proposta dal contrat pel dret da fabrica.

Il cussagl piglia cugnuschentscha da la consultaziun interna dal plan directiv regiunel, intenziun pendiculera Lej dals Chöts/fabricher inavous pendiculera Lagalb, e nun ho d'exprimer ünguotta.

A las 22.40 vain la tschanteda alveda.

In buna fè

L'actuar:  
***D. Schwenninger***